



21. maaji 2019

UPA2019/220

**Angajoqqaat atugarisaannik ilisimasaqarfimmik qitiusumik katersuiffeqalernissaanik pilersitsisoqarnissaanik apeqquteqaat aallaavigalugu oqallississiatut siunnersuut.**  
**Oqallississiatut siunnersuutip siunertarissavaa angajoqqaat atugarisaanik ilisimasanik katersuiveqalernerup kingunerisaanik Angajoqqaat illersuisuanik pilersitsinissamut tunngavissaqalernissaq.**

(Inatsisartunut ilaasortaq Jens NapātōK', Partii Naleraq)

Inatsisartunut ilaasortaq Jens NapātōK', Partii Naleraq apeqquteqaat aallaavigalugu oqallissaarummik siunnersuuteqarpoq tassanilu pineqarpit Angajoqqaat atugarisaannik ilisimasaqarfimmik pilersitsisoqarnissaanik saqqummiussaqluni, tamannalu oqaaseqarfigissavarput.

Nunatsinni angajoqqaanut atugassarititaasut malunnartumik assut assigiinngitsunik inissisimasoqartoq takusinnaasarparput. Ilaqarpugut assorujussuaq angajoqqaanik ilaqtariinnillu ingerlalluartunik. Aammali ilaqarpugut inuttut inuuniarniarnikkut ajornartorsiuteqartartunik, pingaartumik aamma meeqqat eqqarsaatigalugit. Taamatullu atugaqartut qanoq iliornikkut pitsaaneruseumik inuuniarnikkut atugaqarsinnaanerat eqqumaffigilluartariaqartoq isumaqarpugut.

Ukiuni makkunani angajoqqaat avittartut suli amerliartorput soorunami ilaatigut ilimanangilaq avinniannarlutik avittarsimassasut. Tamakkualu aamma sunniuteqartarput meewrarpassuarnut, tassami angajoqqaat inooqatigiikkunnaartarneranni akiliisut annerpaat tassaasarput meeqqat.

Inatsisartunut ilaasortaq Jens Napaattooq saqqummiussaa inuiaqatigiit atukkagut ataatsimut isigalugit soqutiginaateqarpoq, tassami massakkumut ilisimasaqarfimmik qitiusumik katersuiffeqalernissamut angajoqqaat pillugit soqanngilagut soorunami siunissami pissutsit ilungersunartut pingaartumik meeqqat atugaat pillugit paassisutissanik oqarluannarutta soqanngilagut.

Tassami angajoqqaat tamarmik atugarissaartaunngillat, Anaanat kisimiittut, taamatullu aamma Ataatat kisimiittut, inuiaqatigiit iluani inoqataapput ilaatigut meerartaminut pilersuinermikkut assut ilungersunartorsiortarlutik. Taakkuinnaanngillat angajoqqaat aamma amerlasuut aningaasanik isertitamikkut annikippallaartunik inissisimaffeqartarput ilaatigut atugarissaarnerunissaminnut periarfissaqanngivtarlutik.

Tassami sorpassuartigut sunniuteqartarpoq ulluinnarni inuuniarnerannut, pingaartumik isertitakitsut arlariinnik meerartaqartut eqqarsaatigalugit. Anaanat kisimiittut, aammalu Ataatat kisimiittut meeqqaminnik pilersuiniarnermikkut assut ajornartorsiortarput. Meeqqaminnik pilersuiniarlutik angajoqqaat ilarpassui piffissami sivisuumi sulisariaqartarput, inigisaminut, meeqqat atisassaannut inuussutissaannullu akissaqarumallutik. Allammi piffissaq annerpaaq atortarpaat inuttut ilaqtariinnguatullu ingerlassagunik allaat meeqqat sivisuumik kisimiillutik

angerlarsimasariaqartarlutik soorunami tamanna angajoqqaanut kisimiittunut toqqissisimanarunannigilaq sivisuumikqimaqqasarneri pillugit, pingaartumik ukiuni makkunani ajoraluartumik meerarpassuit atornerlunneqartarfiaisa nalaanni.

Pingaartumik aamma nunaqarfinni pissutsit ilungersunarsinnaasarpot uanilu issualaarniarbunga. Tassanilu meeqqat inuuusutunullu inissinneqarsimasunut nalunaarusiaq ”Nunaqarfinni aqutsisut suliniutinut sunniuteqarnerunissamut killilimmik periarfissaqartarput, kommunalbestyrelsinit piginnaataitaanerat killeqartarmat. Nunaqarfinni aqutsisut oqaatigaat meeqqanik inuuusuttunillu suliassaqarfimmik ilisimasaqarnerunissartik pisariaqartillugu, pingaartumik meeqqat sumiginnagaasut pillugit innuttaasunik ilisimatinneqaraangamik qanoq iliornissartik ilisimmasariaqarlugu”

Nunatsinni katissimasut ikiliartuinnavippot, avittartut amerliartuinnarput ajoraluartumik tamannalu meeqqanut assut eqquinerluttartoq nalungilarput. Meerarpassuit angajoqqaani kisimiittuni peroriartortut amerlapput, tamannalu tupinnanngitsumik meerarpassuit inuunerannut allanguerujussuarnermik kinguneqartarpoq, tassanilu aamma angajoqqaat avissaarneranni inuuniarnikkut aningaasaqarnikkullu eqqorneqartarput, ilaatigut ilungersunartumik inuunialernermik kinguneqartartumik.

Takorloorsinnaavarput kisimiittuuneq timikkut tarnikkullu assoroornassaqisoq, tassami akunnerit 24-it kisimiilluni anaanatut ataatatullu nukippassuit atorneqartassapput. Meeqqat napparsimappata ilaatigut erloqinartunik naammattoorsigunik ullaopassuit sulinngissinnaasarpot, tassanilu ineqarnermut akiligassat qaffarujussuartarput, inuussutissaqarnissamullu akissat amigaatigineqalertarlutik, naammattusaariniapiloornerit, aammalu qasuersaarfissaqanngivittarlutik ingerlalersarlutik, pissutsit tamakkua eqqarsaatigissagaanni inuiaqtiginni ikuussinnaanerput pitsaanerusariaqartoq takusinnaavarput.

Angajoqqaat aamma meeqaminik arsaarneqarsimasut ilaatigut ukiorpassuarni meeqqaminik angerlartitsiniarluartut annertunik aporfissalorsorneqartarput, uffa aamma inuunermikkut alloriartarsimagaluartut, pissutsit tamakku ataatsimoortillugit meeqqat angajoqqaallu ikiorneqartarnissaat katsorneqartarnissaallu aallunnerusariaqalerparput, tassami iluatsinnej ajorput amerlasuut tamaasa immikkoortillugit isumaginiarneqartarmata ilaatigut iluatsippallaarneq ajortumik.

Piitsuussuseq naligiinnginnerlu pillugit nassuiaat 2018-mi saqqummersoq tassani issualaarniarbunga. “*Ernera angajulleq immaqa ukiut marluk qaangiummatali takuara (...) panikkalu qanga takunerlugit eqqaamanngilara. Immaqa ukiut sisamat qaangiupput. Apersortimmata peqataanngilanga.*

Aammalu anaanaq kisimiittoo qaluttuartinneqarpoq. “*Ullut tamaasa unnukkut nerisassiortanngilanga. Iffiat panertut nerisarpagut. Tassami unnuit tamaasa naatsiartalinnik, naatitarlinnik, neqilinnik tamanillu akulinnik iganissara akissaqartinngilara. Sipaarniartuartariaqarpunga, tamannalu ajorkusoortaqaaq. Qiviannaarluta angisuutut isikkoraluarpuugut, tamatumunngali pissutaaginnarpoq akikitsuinnarnik nerisaratta. Meeqqakka nerisamikkut akikitsutigut aanaveersaatitortaqat. Kisianni sapinngisamik pitsaanerpaamik iliortarpunga*” Tassa ilaqarpugut taamak atugartunik amerlasuunik ikiortariaqartunik pingaartumik meeraat pillugit.

Ingerlaaseq pitsaanerusoq anguneqassappat taava qanoq iliorluta anguniaqarsinnaavugut. Kommunit tassani saneqqunneqarsinnaanngillat, ilaqtariit ajornartorsiortut pitsaanerusumik inuulersinneqassappata ulluinnarni aningasaqaqnikkut nukittorsarneqartariaqarput. Suliffissaqarnissaat qulakkeerniartariaqarpoq. Minnerunngitsumillu aamma ineqarnermikkut isumannaatsumik atugassaqartinniartariaqarpagut, ajornartorsiutaannik aniguisinneqassappata soorunami ikiorluarlugit peqataatillugit isumassortariaqarlutik.

Isumaqaqluinnarpugut angajoqqaat isumannaatsumik meeqqaminnut isumaginnissappata ajornartorsiutaannik ikorneqartariaqartut. Ulluinnarni inuunerat nukittorsarlugu malinnaaffigalugit siunnersorlugillu. Angajoqqaat avissaarpata aamma meerannguit sorliup tigummissanerai ilaatigut assortuussutaalersarput, allaat angajoqqaat arlaanut takoqqusajunnartarlutik. Meeqqap pisinnaatitaaffigaa angajoqqaaminut attaveqartuarnissani. Taamaattumik paaseqatigiiffiusumik angajoqqaat tamarmik meeqqaminut pisinnaatitaaffeqarnissaat qulaqeerniartariaqarpoq.

Taamaattumik aamma eqqarsaatissatut apuukkusupparput qanoq iliornikkut angajoqqaat atugaannik illersorneqarusinnaappat? Assersuutigalugu aappariit qimappata tamatigorluinnaq amerlasuutigut angut inigisaminik anisinneqartarpoq. Tassa ilaatigut ima nutserneqarsinnaavoq angutaagami anisinneqarpoq. Ullutsinni naligiissitaaneq pingarteqaarput taamaattumik Arnaq angullu assigiimmik sullinneqarnissaat pisussaaffigaarput tamannalu aaqqinniartariaqarpoq.

Angajoqqaat illersuisoqalernissaanik piumassaqassaagut? Imaluunniit qanoq iliornikkut pissutsit ilaatigut angajoqqaarpasuit atugaasa oqilisaaffiginissaanut iliuuseqarsinnaavugut malunnarmammi ikorneqarnissaat ilaatigut pisariaqartinneqartartut.

Taamatut oqaaseqarluta Jens Napaattoq Partii Naleraq oqallissaarutaanut oqaseqarterput saqqummiupparput.

Hans Enoksen